

# 佛說堅固女經

隋三藏法師那連提耶舍 譯



南無本師釋迦牟尼佛

## 說明

本繁體校正版《佛說堅固女經》電子書，根據《乾隆大藏經》大乘單譯經，第 0251 部，隋三藏法師那連提耶舍譯《佛說堅固女經》原藏雕板印刷影印本校正，句讀僅供參考。特此說明。

仁慧草堂

二〇一七年十一月

## ●起誦儀

### 香讚

(一編)

爐香乍爇. 法界蒙薰. 諸佛海會悉遙聞. 隨處結祥雲.  
誠意方殷. 諸佛現全身.

南無香雲蓋菩薩摩訶薩 (合掌三稱)

南無本師釋迦牟尼佛 (合掌三稱)

### 開經偈

(一編)

無上甚深微妙法 百千萬劫難遭遇  
我今見聞得受持 願解如來真實義

# 佛說堅固女經

隋三藏法師那連提耶舍 譯

如是我聞：一時，佛在都娑羅國，舍婆提城，祇樹給孤獨園。

爾時，佛告諸比丘：“汝今諦聽，當爲汝說。有女人欲發阿耨多羅三藐三菩提心者，先當作如是念：‘一切女人所有諂曲、嫉妬、貪瞋、邪僞一切惡事，以發阿耨多羅三藐三菩提心因緣故，於未來世更不復生。’以是義故，諸女人等，必定須發阿耨多羅三藐三菩提心。”

佛說是語時，衆中有一優婆夷名曰堅固，即從座起，整理衣服，合十指掌，而白佛言：“世尊！我今爲欲利益一切衆生故，爲欲施一切衆生安樂故，爲欲憐愍一切世界衆生故，爲欲度脫一切天人故，發阿耨多羅三藐三菩提心。世尊！我於過去無始生死，未來無際流轉，不生怖畏，但爲不斷佛種故，不斷如來種故，不斷一切智種故，發阿耨多羅三藐三菩提心，修菩薩行。世尊！我今爲欲安隱一切衆生故，發菩提心，無救護者爲作救護故，無親友者爲作親友故，無歸依者爲作歸依故，無舍宅者爲作舍宅故。”

是時，長老舍利弗在大眾中作如是念：“此堅固妹爲與一切衆生作親友故，發阿耨多羅三藐三菩提心，以是發心因緣故，世間則有聲聞、辟支佛。”作是念已，即告女言：“妹，汝以發菩提心故，於未來世得見聲聞、辟支佛。”

是時，堅固女白舍利弗言：“我從昔來，流轉生死，未曾得發如是菩提之心，今始得發，我今獲大善利，善得人身，善得壽命。於過去世遇善知識，未曾一念發聲聞、辟支佛心，以是因緣，今復能爲一切衆生發阿耨多羅三藐三菩提心。”

爾時，舍利弗告堅固女言：“汝今善得利益，善得人身，善得壽命，乃能發阿耨多羅三藐三菩提心，如汝所說，應如說行。”

時，堅固女即白大德舍利弗言：“如我所說，我必定修行。”

爾時，舍利弗復問堅固女言：“云何菩薩如說修行？”

女言：“舍利弗，菩薩不樂聲聞地，不樂辟支佛地，但樂如來身、如來地、一切智地。如是，大德舍利弗，是名菩薩摩訶薩如說修行。復次，大德舍利弗，菩薩摩訶薩若布施時，願得阿耨多羅三藐三菩提，不求聲聞、辟支佛地；若持戒、

若忍辱、若精進、若禪定、若修智慧時，願求阿耨多羅三藐三菩提，不求聲聞、辟支佛地，是名菩薩摩訶薩如說修行。”

舍利弗語堅固女言：“如說修行者，得何利益？當爲我說。”

時，堅固女聞此語已，白舍利弗言：“何者是利，汝欲得見？”

舍利弗言：“妹，欲見發阿耨多羅三藐三菩提心利益。”

女言：“彼心相如幻，云何見有利益？”

舍利弗言：“若汝有智慧者，即於此身，能盡苦，得阿羅漢。若汝此身不能盡苦得阿羅漢者，汝之智慧即爲大錯。”

女言：“大德舍利弗，若我此身得阿羅漢者，我之智慧即是顛倒，以我此身不取阿羅漢故，於當來世得阿耨多羅三藐三菩提，是故，當知我之智慧不名顛倒。”

時，舍利弗語堅固女言：“汝經幾時，當得阿耨多羅三藐三菩提？”

女言：“大德舍利弗，我非佛、非阿羅漢，不知幾時當得阿耨多羅三藐三菩提，如舍利弗今得阿羅漢無漏智慧，應知我幾時當得阿耨多羅三

藐三菩提。”

舍利弗言：“我無智慧，不知汝幾時當得阿耨多羅三藐三菩提。”

女言：“我願生生世世不用如舍利弗智慧，從他而解，從他生信。我願得如來、應、正遍知智慧，自知自覺。”

爾時，富樓那彌多羅尼子作是念：“我等住小乘地，得小智慧，若見如來智，乃知我等所得智慧，最爲狹劣，住小地小智慧。”

爾時，大德舍利弗心念：“我等雖得阿羅漢果，不能廣利益衆生，爲大丈夫事。惟有大丈夫，具丈夫法者，能多利益無量衆生，如堅固女，爲自利益及利益一切衆生故，發阿耨多羅三藐三菩提心。”作是念已，即問女言：“阿耨多羅三藐三菩提者，名爲何法？”

堅固女言：“大德舍利弗，阿耨多羅三藐三菩提者，一切法中最上、最勝，更無過者，是名阿耨多羅三藐三菩提。復次，舍利弗，所言阿耨多羅三藐三菩提者，我不見彼法爲阿耨多羅三藐三菩提。”

舍利弗言：“若不見有法名阿耨多羅三藐三菩提者，汝云何發菩提心欲覺菩提？”

女言：“欲令行邪道衆生住正道故，我發阿耨多羅三藐三菩提心。”

舍利弗聞此語已，又問女言：“佛得阿耨多羅三藐三菩提時，不見法，不見道，不見果。汝見何利益，欲覺菩提？”

女聞是已，語舍利弗言：“如是，我得阿耨多羅三藐三菩提時，國土中所有弟子，如舍利弗、目犍連等，見此事故，我欲覺無上菩提。”

舍利弗言：“妹，不可得法中，云何欲覺？”

女言：“如是，如是。舍利弗，我正欲覺此不可得法。不可得法，非得非不得故。以是故，我欲覺阿耨多羅三藐三菩提。覺阿耨多羅三藐三菩提已，轉大法輪，轉法輪時，令三千大千世界衆生普得聞知。”

爾時，舍利弗問堅固妹言：“我云何知汝當來得阿耨多羅三藐三菩提？轉大法輪時，其聲遍滿三千大千世界？”

時，堅固女即以右足大指按地，應時三千大千世界地大震動，惟舍利弗所坐之處其地不動。

時，舍利弗作是念：“今此女人作大神通，乃能令此三千大千世界地皆震動，何故惟我坐處其地不動？爲是佛力？爲是我力？”

爾時，世尊知舍利弗心生念已，告舍利弗言：“於此地中，乃往過去，有千女人同號堅固，皆於汝所坐處發阿耨多羅三藐三菩提心，現大神通，受菩提記。於未來世彌勒出時，亦於此處，有千女人同號堅固，發阿耨多羅三藐三菩提心，現大神力，受菩提記，當得作佛，號勝堅固如來、應、正徧知。”

時，堅固女白佛言：“世尊！若佛菩提非過去得，非現在得，非未來得者，云何世尊說有過去、現在、未來三世諸佛？”

佛言：“如是，如是。佛非過去得，非現在得，非未來得。所以說有過去、未來、現在諸佛者，此但假名，說有三世，非謂諸佛有去、來、今。”

爾時，堅固女白佛言：“世尊！以此法自覺自知，不從他聞因緣故，須發阿耨多羅三藐三菩提心。”

佛言：“善哉！善哉！能如是知，未來當得阿耨多羅三藐三菩提。”

女言：“世尊！無有見如是法不得菩提者，是故我今必定當得阿耨多羅三藐三菩提。”

佛言：“妹，汝未來世教化衆生耶？”

女言：“世尊！無有見如是法不教化者，是故，我今必定當能教化衆生。”

佛言：“汝於來世作大導師耶？”

女言：“世尊！無有見如是法不作導師，是故，我今必定當得作大導師。”

爾時，天帝釋持曼陀羅華，於佛前立，以所持華與堅固女，作如是言：“汝持此華，以散佛上。”

時，堅固女受此華已，以散佛上，以佛神力住於虛空。

爾時，世尊即便微笑，諸佛法爾若微笑時，青、黃、赤、白、紫、玻瓈色種種雜光，從口中出，其光徧照至于梵天，還至佛所，遶佛三帀，還從頂入。

爾時，阿難白佛言：“世尊！諸佛非以無事及小因緣而便微笑，何因緣故，如是微笑？”

佛告阿難：“汝見此堅固女不？是女於此命終，捨女人身，得成男子，於星宿劫中，得阿耨多羅三藐三菩提，號曰普見如來，應供，正徧知。其普見佛初會說法，有二十百千萬億人得盡諸漏，棄捨重擔，證阿羅漢；第二說法，有一十五百千萬億人得阿羅漢；第三說法，有一十百千萬億人

得阿羅漢；從是已後，無量百千萬億那由他衆得阿羅漢果。如是，阿難，彼普見如來刹土之中，無有地獄、餓鬼、畜生，其國衆生悉皆成就十善業道，不修商賈農作，其佛國土有無量功德。是故，若有善男子、善女人，發阿耨多羅三藐三菩提心者，於彼人所，不應起輕慢心。唯有如來明知此事，非餘聲聞、辟支佛等所能了知。是故，阿難，若有愛樂我者，尊重我者，不應於菩薩所，生輕憊心。”

佛說此法已，長老阿難、大德舍利弗、堅固優婆夷，及一切天、人等，聞佛說法，皆大歡喜。

《佛說堅固女經》卷終

## ● 結誦儀

### 補闕真言

(三編)

南無喝囉怛那. 哆囉夜耶. 佉囉佉囉. 俱住俱住.  
摩囉摩囉. 虎囉. 吽. 賀賀. 蘇怛那. 吽. 潑抹拏. 娑  
婆訶.

### 三皈依

(一編)

自皈依佛，當願眾生，體解大道，發無上心；  
自皈依法，當願眾生，深入經藏，智慧如海；自  
皈依僧，當願眾生，統理大眾，一切無礙，和南  
聖眾。

南無佛 南無法 南無僧 (合掌三稱)

南無一切如來、應、正等覺 (合掌三稱)

南無本師釋迦牟尼佛 (合掌三稱)

# 迴向偈

(一編)

誦經功德殊勝行 無邊勝福皆迴向  
 普願沉溺諸有情 速往無量光佛刹  
 十方三世一切佛 一切菩薩摩訶薩  
 摩訶般若波羅蜜

# 迴向偈

(一編)

願以此功德 莊嚴佛淨土  
 上報四重恩 下濟三途苦  
 若有見聞者 悉發菩提心  
 盡此一報身 同生極樂國



此咒置經書中可滅誤跨之罪

南无护法韦驮尊天菩萨

